

خطِ یهودا

پیشگفتار

خطِ یهودا بلده ازی نوشته شده که ایماندارا ره د باره راه-و-رفتارِ کسای باخبر کُنه که خود ره ایماندار مُوگفت، ولے نبُود. اُو امچنان تاکید مونه که اُمو رقم کسا حتماً محکوم موشه. امزی خاطر اُو ایماندارا ره تشویق مونه که بلده نگاه کدون ایمان و عقیده خو که یگ دفعه د ایماندارا دده شده، سخت کوشش کنه و اُستوار و پایدار بُمَنه.

طبقه-بندی موضوعها

دُعا و سلام (آیه ۱)

باخبر کدو د باره مردُمای بے خُدا (۳)

اخطارها و نصیحت‌های آخر (۱۷)

حمد-و-ثنا د خُدا (۲۴)

دُعا و سلام

۱) از طرفِ یهوذا غلامِ عیسیٰ مسیح و برارِ یعقوبِ بلدهِ کوی شده‌های که دَ نظرِ خدا یعنی آتِه آسمانی دوست-دَشْتَنی آسته و دَ عیسیٰ مسیح حفظ شده: ۲) رَحمت، سلامتی و مُحَبَّت پَریمو نصیب شُمو شنه.

باخبر کدو دَ باره مردُمای بے خدا

۳) اَی عزیزا، ما کَلو شوق دَشْتُم دَ باره نجاتی بلدهِ شُمو نوشته کُنم که پگ مو دَزو شریک آستی، مگم دَ عینِ وخت لازم دَنِسْتُم که چند خط نوشته کده شُمو ره تشویق کُنم تا دَ باره ایمانی که یگ بار بلده همیشه دَ مُقَدَّسین دده شد، سخت کار کُنید. ۴) چُون بعضی کسا تاشکی دَ بَینِ شُمو جای گِرِفْتِه که از قدیم محکومیتِ ازوا پیش‌بینی شده. اونا مردُمای بے خدا آسته که پیغامِ فیضِ خدای مو ره بلده فسق-و-فساد خُو کَج معنی مونه و یگانه بادار و مولای مو عیسیٰ مسیح ره انکار مونه.

۵) اگرچه شُمو ازی چیزا باخبر آستید، ولے میخائیم دَ یاد شُمو بیرم که خداوند قومِ اسرائیل ره از سرزمینِ مصر نجات دد، مگم بعد از یگ زمان کسای ره که ایمان نورد نابود کد. ۶) امی رقم ملایکه‌های که مقام خُو ره نگاه نکد، بلکه جایگاه مناسب خُو ره ایله کد، خدا اونا ره دَ زنجیرای ابدی دَ تریکی تیره بلده قضاوت دَ روزِ بزرگ نگاه کده. ۷) دَ امزی رقم سدوم و عموره و آغیلای گردوبر شی که مثل ازوا خود ره تسلیمِ فسادِ اخلاقی کد و پُشتِ جنسِ غیرِ طبیعی رفت، دَ عنوانِ نمونه عبرت دَ آتشِ ابدی سوخته و جزا دیده موره.

۸) لیکن باوجودِ ازی، امی کسای ام که خاو دیده موره، جسم‌های خُو ره نجس مونه و قدرت-و-اختیارِ الهی ره رد کده دَ ضدِ حکمرانای آسمانی کُفرگویی مونه، ۹) دَ حالیکه حتی میکائیل ملایکه اعظم، وختیکه دَ باره جسدِ موسیٰ قد

ابلیس جر-و- بحث موكد، جُرأت نكد كه او ره محكوم د كُفرگویی كُنه، بلكه گُفت: ”خداوند تُو ره سرزنش كُنه!“ (۱۰) لیکن ای مردم د ضد چیزای كه نموفامه بدگویی مونه و چیزای ره ام كه رقم حیوانای بے وقوف طبیعتاً موفامه، د وسیله ازوا نابود موشه. (۱۱) وای د حال ازوا، چراكه اونا د راه قائن نابود شده. (۱۲) امی آدما د مهمانی‌های پُر محبت شمو رقم مارهای منه استین آسته كه بے پروا قد شمو سر دسترخو شسته خودون ره سیر مونه. اونا مثل آورهای بے بارش آسته كه د وسیله باد برده موشه؛ اونا رقم درختای تیرماهی بے میوه آسته كه كاملاً مرده و از ریشه كنده شده. (۱۳) اونا جلیپه‌های سرکش دریا آسته كه رسوایی خو ره رقم قف آلی باله بر مونه و ستاره‌های سرگردو آسته كه تریکی تیره تا ابد بلده ازوا مقرر شده.

(۱۴) د باره امزیا حنوخ هفتمین نسلِ آدم پیشگویی كده گُفت: ”اینه، خداوند قد هزاران هزار مقدسین خو مییه (۱۵) تا د بِلَه پگ قضاوت كُنه و تمام بے خداها ره بخاطر تمام کارای بے خدایي كه اونا د مطابق بے خدایي خو كده و بخاطر پگ تورای زشت كه گناهکارای بے خدا د ضد ازو گُفته، محكوم كُنه.“ (۱۶) امیا كسای آسته كه نقِ نق و شكایت مونه و مطابقِ خاهشاتِ نفس خو رفتار موكُنه. امیا تورای كُنه موكیه و د پیشِ مردمِ بخاطرِ فایده خو چاپلوسی موكُنه.

اخطارها و نصیحت‌های آخر

(۱۷) مگم شمو ای عزیزا، تورای ره كه رسولای مولای مو عیسیٰ مسیح پیشگویی كد د یاد دشته بشید، (۱۸) چُون اونا دز شمو گُفته: ”د زمانِ آخرِ مردُمای ریشخندگر مییه كه مطابقِ خاهشاتِ بے خدایي خو رفتار مونه.“ (۱۹) امیا كسای آسته كه د مینكل شمو تفرقه میندزه؛ امیا مردُمایِ نفسانی آسته كه روحِ خدا دز شی وجود ندره.

(۲۰) مَگم شُمو، اَی عزیزا، خودون ره دَ وسیله ایمانِ بے اندازه مُقدَّس خُو آباد
 کُنید و دَ هِدایتِ روحِ اَلْقُدس دُعا کُنید (۲۱) و خودون ره دَ مُحَبَّتِ خُدا نِگاه کده
 چیم دَ راهِ رَحمتِ مَولای مو عیسیٰ مَسیح بِشید که شُمو ره دَ زندگی اَبَدی
 راهنمایی مونه. (۲۲) دَ حقِ کسای که دِل-و-نادرلِ آسته دِلسوز بِشید. (۲۳)
 بعضی‌ها ره از آتِش بُر کده نِجات بَدید؛ دَ بعضی‌های دِیگه قد ترس مِه‌ربانی کُنید،
 لیکن دَ عَینِ حال، از کالای که قد جِسَم‌های ازوا آلوده شُدِه نَفَرَت کُنید.

حمد-و-ثنا دَ خُدا

(۲۴) آلی دَ خُدای که مِیتنه شُمو ره از اُفتَدو نِگاه کُنه و شُمو ره بے عیب و
 خوشحال دَ حُضُورِ پُر جلال خُو قرار بَدیه، (۲۵) یعنی دَ خُدای یکتا و نِجات دِهنده
 مو، دَ وسیله عیسیٰ مَسیح مَولای مو، از اَزَل تا آلی و تا اَبَدُالاباد، بُزرگی-و-
 جلال، شِکوه، قُدرت و اِختیار باد. آمین.